

讚
阿
彌
陀
佛
偈



讚阿彌陀佛偈

曇鸞大師 作

南無阿彌陀佛

釋名無量壽，傍
經奉讚亦曰安養

南無至心歸命禮西方阿彌陀佛。

¹現在西方去此界，十萬億剎安樂土，佛世尊號阿彌陀，我願往生歸命禮。

願共諸眾生，往生安樂國。

南無至心歸命禮西方阿彌陀佛。

²成佛以來歷十劫，壽命方將無有量，法身光輪遍法界，照世盲冥故頂禮。

願共諸眾生，往生安樂國。

南無至心歸命禮西方阿彌陀佛。

³智慧光明不可量，故佛又號無量光。有量諸相蒙光曉，是故稽首真實明。

願共諸眾生，往生安樂國。

南無至心歸命禮西方阿彌陀佛。

⁴ 解脫光輪無限齊，故佛又號無邊光。蒙光觸者離有無，是故稽首平等覺。
願共諸眾生，往生安樂國。

南無至心歸命禮西方阿彌陀佛。

⁵ 光雲無礙如虛空，故佛又號無礙光。一切有礙蒙光澤，是故頂禮難思議。
願共諸眾生，往生安樂國。

南無至心歸命禮西方阿彌陀佛。

⁶ 清淨光明無有對，故佛又號無對光。遇斯光者業繫除，是故稽首畢竟依。
願共諸眾生，往生安樂國。

南無至心歸命禮西方阿彌陀佛。

⁷ 佛光照耀最第一，故佛又號光炎王。三塗黑闇蒙光啟，是故頂禮大應供。

願共諸眾生，往生安樂國。

南無至心歸命禮西方阿彌陀佛。

⁸道光明朗色超絕，故佛又號清淨光。一蒙光照罪垢除，皆得解脫故頂禮。

願共諸眾生，往生安樂國。

南無至心歸命禮西方阿彌陀佛。

⁹慈光遐被施安樂，故佛又號歡喜光。光所至處得法喜，稽首頂禮大安慰。

願共諸眾生，往生安樂國。

南無至心歸命禮西方阿彌陀佛。

¹⁰佛光能破無明闇，故佛又號智慧光。一切諸佛三乘眾，咸共歎譽故稽首。

願共諸眾生，往生安樂國。

南無至心歸命禮西方阿彌陀佛。

¹¹光明一切時普照，故佛又號不斷光。聞光力故心不斷，皆得往生故頂禮。

願共諸眾生，往生安樂國。

南無至心歸命禮西方阿彌陀佛。

¹²其光除佛莫能測，故佛又號難思光。十方諸佛歎往生，稱其功德故稽首。

願共諸眾生，往生安樂國。

南無至心歸命禮西方阿彌陀佛。

¹³神光離相不可名，故佛又號無稱光。因光成佛光赫然，諸佛所歎故頂禮。

願共諸眾生，往生安樂國。

南無至心歸命禮西方阿彌陀佛。

¹⁴光明照耀過日月，故佛號超日月光。釋迦佛歎尚不盡，故我稽首無等等。

願共諸眾生，往生安樂國。

南無至心歸命禮西方阿彌陀佛。

哀愍覆護我，令法種增長。此世及後生，願佛常攝受。

願共諸眾生，往生安樂國。

南無至心歸命禮西方極樂世界觀世音菩薩。

願共諸眾生，往生安樂國。

南無至心歸命禮西方極樂世界大勢至菩薩。

願共諸眾生，往生安樂國。

南無至心歸命禮西方極樂世界諸菩薩清淨大海眾。

願共諸眾生，往生安樂國。

普為師僧、父母及善知識、法界眾生斷除三障，同得往生阿彌陀佛國，
歸命懺悔。

南無至心歸命禮西方阿彌陀佛。

¹⁵阿彌陀佛初會眾，聲聞菩薩數無量，神通巧妙不能算，是故稽首廣大會。

願共諸眾生，往生安樂國。

南無至心歸命禮西方阿彌陀佛。

¹⁶ 安樂無量摩訶薩，咸當一生補佛處；除其本願大弘誓，普欲度脫諸眾生。
斯等寶林功德聚，一心合掌頭面禮。

願共諸眾生，往生安樂國。

南無至心歸命禮西方阿彌陀佛。

¹⁷ 安樂國土諸聲聞，皆光一尋若流星。菩薩光輪四千里，若秋滿月映紫金。
集佛法藏為眾生，故我頂禮大心海。

願共諸眾生，往生安樂國。

南無至心歸命禮西方阿彌陀佛。

¹⁸ 又觀世音大勢至，於諸聖眾最第一，慈光照曜大千界，侍佛左右顯神儀。
度諸有緣不暫息，如大海潮不失時，如是大悲大勢至，一心稽首頭面禮。

願共諸眾生，往生安樂國。

南無至心歸命禮西方阿彌陀佛。

¹⁹ 其有眾生安樂，悉具三十有二相，智慧滿足入深法，究暢道要無障礙，隨根利鈍成就忍，二忍乃至不可計，宿命五通常自在，至佛不更雜惡趣，除生他方五濁世，示現同如大牟尼。生安樂國成大利，是故至心頭面禮。願共諸眾生，往生安樂國。

南無至心歸命禮西方阿彌陀佛。

²⁰ 安樂菩薩承佛神，於一食頃詣十方，不可算數佛世界，恭敬供養諸如來。華香伎樂從念現，寶蓋幢幡隨意出，珍奇絕世無能名，散華供養殊異寶。化成華蓋光晃耀，香氣普熏莫不周，華蓋小者四百里，乃有遍覆一佛界。隨其前後次化去，是諸菩薩僉欣悅，於虛空中奏天樂，雅讚德頌揚佛慧。聽受經法供養已，未食之前騰虛還，神力自在不可測，故我頂禮無上尊。願共諸眾生，往生安樂國。

南無至心歸命禮西方阿彌陀佛。

²¹安樂佛國諸菩薩，夫可宣說隨智慧，於己萬物亡我所，淨若蓮華不受塵，往來進止若泛舟，利安為務捨適莫。彼已猶空斷二想，燃智慧炬照長夜，三明六通皆已足，菩薩萬行貫心眼。如是功德無邊量，是故至心頭面禮。願共諸眾生，往生安樂國。

²²南無至心歸命禮西方阿彌陀佛。

安樂聲聞菩薩眾，人天智慧咸洞達，身相莊嚴無殊異，但順他方故列名。顏容端正無可比，精微妙軀非人天，虛無之身無極體，是故頂禮平等力。

願共諸眾生，往生安樂國。

南無至心歸命禮西方阿彌陀佛。

²³敢能得生安樂國，皆悉住於正定聚，邪定不定其國無，諸佛咸讚故頂禮。

願共諸眾生，往生安樂國。

南無至心歸命禮西方阿彌陀佛。

²⁴ 諸聞阿彌陀德號，信心歡喜慶所聞，乃暨一念至心者，迴向願生皆得往，唯除五逆謗正法，故我頂禮願往生。

願共諸眾生，往生安樂國。

南無至心歸命禮西方阿彌陀佛。

²⁵ 安樂菩薩聲聞輩，於此世界無比方，釋迦無礙大辯才，設諸假令示少分。最賤乞人並帝王，帝王復比金輪王，如是展轉至六天，次第相形皆如始。以天色像喻於彼，千萬億倍非其類，皆是法藏願力為，稽首頂禮大心力。

願共諸眾生，往生安樂國。

南無至心歸命禮西方阿彌陀佛。

²⁶ 天人一切有所須，無不稱欲應念至，一寶二寶無量寶，隨心化造受用具，堂宇飲食悉如此，故我稽首無稱佛。

願共諸眾生，往生安樂國。

南無至心歸命禮西方阿彌陀佛。

27 諸往生者悉具足，清淨色身無可比，神通功德及宮殿，服飾莊嚴如六天。應器寶鉢自然至，百味嘉餚條已滿，見色聞香意為食，忽然飽足受適悅。所味清淨無所著，事已化去須復現，晏安快樂次泥洹，是故至心頭面禮。願共諸眾生，往生安樂國。

南無至心歸命禮西方阿彌陀佛。

28 十方佛土菩薩眾，及諸比丘生安樂，無量無數不可計，已生今生當亦然，皆曾供養無量佛，攝取百千堅固法。如是大士悉往生，是故頂禮阿彌陀。願共諸眾生，往生安樂國。

南無至心歸命禮西方阿彌陀佛。

29 若聞阿彌陀德號，歡喜讚仰心歸依，下至一念得大利，則為具足功德寶。設滿大千世界火，亦應直過聞佛名，聞阿彌陀不復退，是故至心稽首禮。願共諸眾生，往生安樂國。

南無至心歸命禮西方阿彌陀佛。

³⁰神力無極阿彌陀，十方無量佛所歎。東方恆沙諸佛國，菩薩無數悉往覲，亦復供養安樂國，菩薩聲聞諸大眾。聽受經法宣道化，自餘九方亦如是。釋迦如來說偈頌，無量功德故頂禮。

願共諸眾生，往生安樂國。

南無至心歸命禮西方阿彌陀佛。

³¹諸來無量菩薩眾，為植德本致虔恭，或奏音樂歌歎佛，或頌佛慧照世間，或以天華衣供養，或睹淨土興等願。如是聖眾悉現前，蒙八梵聲授佛記，一切菩薩增願行，故我頂禮婆伽婆。

願共諸眾生，往生安樂國。

南無至心歸命禮西方阿彌陀佛。

³²聖主世尊說法時，大眾雲集七寶堂，聽佛開示咸悟入，歡喜充遍皆得道。於時四面起清風，擊動寶樹出妙響，和韻清徹遏絲竹，踰於金石無倫比。

天華繽紛逐香風，自然供養常不息，諸天復持天華香，百千伎樂用致敬。
如是功德三寶聚，故我運想禮講堂。

願共諸眾生，往生安樂國。

南無至心歸命禮西方阿彌陀佛。

³³妙土廣大超數限，自然七寶所合成。佛本願力莊嚴起，稽首清淨大攝受。

願共諸眾生，往生安樂國。

南無至心歸命禮西方阿彌陀佛。

³⁴世界光曜妙殊絕，適悅宴安無四時，自利利他力圓滿，歸命方便巧莊嚴。

寶地澄淨平如掌，無有山川陵谷阻，若佛神力須則見，稽首不可思議尊。

願共諸眾生，往生安樂國。

南無至心歸命禮西方阿彌陀佛。

³⁵道樹高四百萬里，周圍由旬有五十，枝葉布里二十萬，自然眾寶所合成。月光摩尼海輪寶，眾寶之王而莊嚴，周匝垂間寶瓔珞，百千萬種色變異。光焰照耀超千日，無極寶網覆其上，一切莊嚴隨應現，稽首頂禮道場樹。

願共諸眾生，往生安樂國。

南無至心歸命禮西方阿彌陀佛。

³⁶微風吹樹出法音，普流十方諸佛刹。聞斯音得深法忍，至成佛道不遭苦。神力廣大不可量，稽首頂禮道場樹。

願共諸眾生，往生安樂國。

南無至心歸命禮西方阿彌陀佛。

³⁷樹香樹色樹音聲，樹觸樹味及樹法，六情遇者得法忍，故我頂禮道場樹。

願共諸眾生，往生安樂國。

南無至心歸命禮西方阿彌陀佛。

38
蒙道場樹對六根，乃至成佛根清徹。音響柔順無生忍，隨力淺深咸得證。此樹威德所由來，皆是如來五種力。神力本願及滿足，明了堅固究竟願。慈悲方便不可稱，歸命稽首真無量。

願共諸眾生，往生安樂國。

南無至心歸命禮西方阿彌陀佛。

39
從世帝王至六天，音樂轉妙有八重，展轉勝前億萬倍，寶樹音麗倍亦然。復有自然妙伎樂，法音清和悅心神，哀婉雅亮超十方，故我稽首清淨樂。

願共諸眾生，往生安樂國。

南無至心歸命禮西方阿彌陀佛。

40
七寶樹林周世界，光耀鮮明相映發。華果枝葉更互為，稽首本願功德聚。

願共諸眾生，往生安樂國。

南無至心歸命禮西方阿彌陀佛。

⁴¹清風時時吹寶樹，出五音聲宮商和。微妙雅曲自然成，故我頂禮清淨薰。
願共諸眾生，往生安樂國。

南無至心歸命禮西方阿彌陀佛。

⁴²其土廣大無崖際，眾寶羅網遍覆上，金縷珠璣奇異珍，不可名寶為校飾。
周匝四面垂寶鈴，調風吹動出妙法。和雅德香常流布，聞者塵勞習不起。
此風觸身受快樂，如比丘得滅盡定。風吹散華滿佛土，隨色次第不雜亂，
華質柔軟烈芬芳，足履其上下四指，隨舉足時還如故，用訖地開沒無遺，
隨其時節華六返，不可議報故頂禮。

願共諸眾生，往生安樂國。

南無至心歸命禮西方阿彌陀佛。

⁴³眾寶蓮華盈世界，一一華百千億葉；其華光明色無量，朱紫紅綠間五色，
焯燁煥爛曜日光，是故一心稽首禮。

願共諸眾生，往生安樂國。

南無至心歸命禮西方阿彌陀佛。

⁴⁴
一一華中所出光，三十六百有千億；一一光中有佛身，多少亦如所出光；佛身相好如金山，一一又放百千光。普為十方說妙法，各安眾生於佛道。如是神力無邊量，故我歸命阿彌陀。

願共諸眾生，往生安樂國。

南無至心歸命禮西方阿彌陀佛。

⁴⁵
樓閣殿堂非工造，七寶雕綺化所成。明月珠璫交露幔，各有浴池形相稱。八功德水滿池中，色味香潔如甘露。黃金池者白銀沙，七寶池沙互如此。池岸香樹垂布上，栴檀芬馥常流馨。天華璀璨為映飾，水上熠熠若景雲。無漏依果難思議，是故稽首功德藏。

願共諸眾生，往生安樂國。

南無至心歸命禮西方阿彌陀佛。

⁴⁶ 菩薩聲聞入寶池，隨意淺深如所欲。若須灌身自然注，欲令旋復水尋還。調和冷暖無不稱，神開體悅蕩心垢。清明澄潔若無形，寶沙映徹如不深。澹淡迴轉相注灌，婣約容豫和人神。微波無量出妙響，隨其所應聞法語。或聞三寶之妙章，或聞寂靜空無我，或聞無量波羅蜜，力不共法諸通慧，或聞無作無生忍，乃至甘露灌頂法。隨根性欲皆歡喜，順三寶相真實義。菩薩聲聞所行道，於是一切悉具聞。三塗苦難名永閉，但有自然快樂音。是故其國號安樂，頭面頂禮無極尊。

願共諸眾生，往生安樂國。

南無至心歸命禮西方阿彌陀佛。

⁴⁷ 本師龍樹摩訶薩，誕形像始理頹綱。關閉邪扇開正轍，是閻浮提一切眼。伏承尊語歡喜地，歸阿彌陀生安樂。

願共諸眾生，往生安樂國。

南無至心歸命禮西方阿彌陀佛。

譬如龍動雲必隨，閻浮提放百卉舒。南無慈悲龍樹尊，至心歸命頭面禮。

願共諸眾生，往生安樂國。

南無至心歸命禮西方阿彌陀佛。

我從無始循三界，為虛妄輪所迴轉。一念一時所造業，足繫六道滯三塗。

唯願慈光護念我，令我不失菩提心。我讚佛慧功德音，願聞十方諸有緣。

欲得往生安樂者，普皆如意無障礙。所有功德若大少，迴施一切共往生。

南無不可思議光，一心歸命稽首禮。

願共諸眾生，往生安樂國。

南無至心歸命禮西方阿彌陀佛。

十方三世無量慧，同乘一如號正覺。二智圓滿道平等，攝化隨緣故若干。

我歸阿彌陀淨土，即是歸命諸佛國。我以一心讚一佛，願遍十方無礙人。

如是十方無量佛，咸各至心頭面禮。

願共諸眾生，往生安樂國。

南無至心歸命禮西方阿彌陀佛。

哀愍覆護我，令法種增長。此世及後生，願佛常攝受。

願共諸眾生，往生安樂國。

南無至心歸命禮西方極樂世界觀世音菩薩。

願共諸眾生，往生安樂國。

南無至心歸命禮西方極樂世界大勢至菩薩。

願共諸眾生，往生安樂國。

南無至心歸命禮西方極樂世界諸菩薩清淨大海眾。

願共諸眾生，往生安樂國。

普為師僧、父母及善知識、法界眾生斷除三障，同得往生阿彌陀佛國，
歸命懺悔。

讚阿彌陀佛偈

讚一百九十五 禮五十一拜